

# SIÐAREGLUR

## þeirra sem kjörnir eru í sveitarstjórn og fastanefndir í Hörgársveit

1. gr.

### *Markmið siðareglanna*

Í reglum þessum er skráð og skilgreind sú háttsemi sem kjörnir fulltrúar vilja sýna af sér við öll sín störf.

2. gr.

### *Starfsskyldur kjörinna fulltrúa*

Kjörnir fulltrúar gegna störfum sínum af alúð og samviskusemi og gæta hagsmuna Hörgársveitar. Í störfum sínum er kjörinn fulltrúi bundinn af lögum, reglum og samþykktum Hörgársveitar, sem og sannfæringu sinni.

Kjörnir fulltrúar hafa ávallt í heiðri grundvallarreglur góðrar stjórnsýslu í störfum sínum, þ.m.t. gagnsæja og upplýsta ákvarðanatöku, og framkvæma ekkert það sem er til þess fallið að vekja grunsemdir um að annað en lögmæt og málefnaleg sjónarmið ráði för við stjórn Hörgársveitar.

Kjörnir fulltrúar móta stefnu og hafa eftirlit með rekstri Hörgársveitar. Kjörnir fulltrúar gæta þess að framkvæmd stjórnsýslu og rekstrar sveitarfélagsins sé ávallt eins og best verður á kosið.

Kjörnir fulltrúar aðhafast ekkert það sem falið getur í sér misnotkun á almannafé. Kjörnir fulltrúar forðast að hafast nokkuð það að sem er þeim til vanvirðu eða álitshnekkis eða sem varpað getur rýrð á störf þeirra eða Hörgársveit.

Kjörnir fulltrúar upplýsa íbúa Hörgársveitar um framkvæmd starfa sinna og atriði sem skipta máli í rekstri sveitarfélagsins eins og kostur er. Þeir eru ávallt reiðubúnir að axla ábyrgð á störfum sínum.

3. gr.

### *Valdmörk*

Kjörnir fulltrúar gæta þess að fara ekki út fyrir umboð sitt í störfum sínum og virða verkaskiptingu í stjórnkerfi Hörgársveitar. Þeir sýna störfum og réttindum annarra kjörinna fulltrúa og starfsmanna Hörgársveitar virðingu.

Kjörnir fulltrúar virða aðgerðir í þágu stjórnsýslueftirlits hjá Hörgársveit og leggja sitt af mörkum til að slíkt eftirlit nái markmiðum sínum.

4. gr.

### *Hagsmunaárekstrar*

Kjörnir fulltrúar forðast hagsmunaárekstra í störfum sínum og vekja athygli á því ef hætta er á slíkum árekstrum. Á þetta einnig við ef þær breytingar verða á högum kjörins fulltrúa, að valdið gætu slíkum hagsmunaárekstrum.

Um mat á hæfi við afgreiðslu einstakra mála og málsmeðferð í því sambandi fer eftir hæfisreglum samþykktar um stjórn Hörgársveitar og fundarsköpum sveitarstjórnar.

Kjörnir fulltrúar nýta sér ekki stöðu sína í þágu einkahagsmuna sinna eða annarra sem eru þeim tengdir, hvort sem ávinningur af slíku kemur fram strax eða síðar, þ.m.t. eftir að störfum fyrir Hörgársveit lýkur.

Skrifstofa sveitarfélagsins heldur skrá, og birtir opinberlega, um fjárhagslega hagsmuni sveitarstjórnarfulltrúa, svo og um trúnaðarstörf þeirra utan sveitarstjórnar í samræmi við reglur þar um.

5. gr.

#### *Gjafir og fríðindi*

Kjörnir fulltrúar þiggja ekki gjafir, fríðindi eða önnur hlunnindi frá viðskiptamönnum eða þeim, er leita eftir þjónustu Hörgársveitar nema að um sé að ræða óverulegar gjafir. Kjörnir fulltrúar þiggja ekki gjafir eða hlunnindi ef líta má á það sem endurgreiðslu fyrir greiða eða sérstaka þjónustu.

6. gr.

#### *Trúnaður*

Kjörnir fulltrúar gæta þagnarskyldu um það sem þeir fá vitneskju um í starfi sínu og leynt á að fara vegna einkahagsmuna eða almannahagsmuna samkvæmt lögum eða eðli máls. Trúnaðurinn helst áfram eftir að kjörnir fulltrúar láta af störfum.

Kjörnir fulltrúar virða trúnað um ummæli einstakra fundarmanna á lokuðum fundum í nefndum og stjórnnum Hörgársveitar, sem og um innihald skjala eða annarra gagna, sem þeir fá aðgang að vegna starfa sinna og trúnaður skal vera um, enda byggi hann á lögætum og málefnalegum rökum.

7. gr.

#### *Stöðuveitingar*

Kjörnir fulltrúar gæta þess að við stöðuveitingar hjá Hörgársveit sé í hvívetna fylgt lögum og reglum og að einungis málefnalegar forsendur liggi að baki vali á starfsmönnum.

8. gr.

#### *Miðlun siðareglna til kjörinna fulltrúa og almennings*

Kjörnir fulltrúar undirgangast þessar siðareglur með undirskrift sinni og lýsa því þar með yfir að þeir ætli að hafa þær að leiðarljósi. Siðareglurnar skulu vera aðgengilegar starfsfólki sveitarfélagsins, almenningi og fjölmiðlum á heimasíðu sveitarfélagsins og annan þann hátt sem sveitarstjórn ákveður til að þessir aðilar geti gert sér grein fyrir meginreglum þeirra.

*Samþykkt í sveitarstjórn Hörgársveitar 20. febrúar 2013*